

四庫全書

集部



欽定四庫全書

海桑集卷三

明 陳謨 撰

表箋

韶州衛賀表

伏以金莖瑞應開寶厯於千秋玉陛班齊效華封之三  
祝神人攸慶海宇同歡睿哲超凡英雄卓冠勵精圖治  
法乎天地之大日月之明遠近歸誠沛乎雨露之施江  
海之潤都虎踞龍蟠之形勝集文韜武畧之俊髦定律



書既以制百姓於刑之中興國學又以育羣才為治之本赫然王業之盛實惟天運之新臣某等馳賀情深守邊道阻嵩高呼萬歲莫陪抃舞於端門簫韶奏九成嘉樂昇平於率土

韶州府賀表

伏以天生明聖應五百餘歲之昌期聖壽齊天垂億萬斯年之正統日甫躔於房次電正統於斗樞英畧如神仁威無敵江東王氣指日戡定於中原海隅蒼生厚澤



涵濡於率土恭儉優於文帝功烈盛乎太宗喜溢臣鄰  
春融中外臣某忝居司牧深戀闕庭曰壽曰富曰多男  
敢效華封之祝宜民宜人宜受祿載歌周雅之章

江西省賀正表

月上元日義和之歷萬斯年時乘六龍春秋之義大一  
統神人同慶中外交懽文武兼資英雄冠世眷命所在  
宗廟社稷永有依歸天戈所揮華夏蠻貊罔不率俾矧  
恭儉有加於文景宜雍熙自復於唐虞臣某等分閭大



卷三  
江之西馳心魏闕之北承恩孔厚報效無庸十部簫韶  
知舞鳳凰於丹禁九重閭闔阻陪鵷鷺於彤墀

賀王后箋

人時肇紀集嘉慶於新元王化由基資玄功於內治厚  
德以載率土攸歸順德配乾昌期符泰娥皇正位贊虞  
帝之雍熙太姒徽音啟周王之聖武宜茂膺於多祉益  
弘暢於皇風臣某馳賀心長守邊地遠銀屏珠箔遙瞻  
象服之輝鳳吹霞觴敬上椒花之頌



賀皇太子箋

問寢龍樓正雞人之送曉朝元玉陛喜鳳曆之迎春運  
式啟於三元懽遠騰於四國前星應瑞文德重華日月  
緝熙受文皇之帝範英雄韜畧披神禹之輿圖茂介春  
祺允膺天祿臣某深慙戎服莫侍青宮每依韶石之雲  
第專防禦遙想秦淮之水倍切朝宗

韶州衛賀表

乾元位九五風霆神於八區天子壽萬年日月煥於四



表神人同慶中外交懽文武兼資英雄冠世法貞觀之  
政要永成貞觀之太平考職方之貢圖必復職方之土  
宇紹百王之正統垂萬代之弘規臣某備守南荒遥瞻  
北闕效封人之三祝奚罄頌言堅外閫之一心豈勝攀  
戀

中宮箋

上帝赫靈誕生聖主周邦隆化尤頌后妃當三呼嵩嶽  
之晨應千歲蟠桃之瑞徽音夙著懿德允孚正位中闈



著母儀而育物早朝珮玉順地道以承天椒房之譽載  
興麟趾之祥斯著臣某瞻依宸極阻賀闕庭紫府蓬萊  
遙上長生之籙金莖沆瀣同為萬壽之期

東宮箋

少昊行秋玉露散金天之彩前星從帝龍樓移鳳輦之  
輝仁壽同躋堪輿均慶德由至聖武有雄才師傅之隆  
所講者帝王之事業軍國之重所植者天下之本根當  
北闕獻壽之祥正東宮侍膳之禮臣某極深雀躍莫遂



鳧趨守禦韶陽功無能於分寸瞻依建業天豈遠於九重

東宮箋

聖主御天上千秋之金鑑儲皇侍膳觴九醞之紫霞海  
宇歸心神人交慶主震之器應乾之剛天縱英姿佩服  
帝堯之言行日新大業躬脩神禹之儉勤本支實隆軍  
國攸重臣某忻逢景運叨守殊方莫陪金殿之班惟伸  
祝頌遙望龍樓之曉陪切瞻依



中宮箋

王道大成已詠周詩之麟趾天顏有喜載觀舜樂之鳳  
儀軒轅之歷萬年金母之桃三寶中宮內治天下母儀  
德合無彊應乾行之中正禮嚴助奠茂宗慶於本支屬  
茲獻壽之辰敬上齊天之祝臣某等承恩有幸治郡何能  
犬馬驅馳薄效勤勞於韶石鴛鴻翔集惟深攀戀於瑤池

頌

鄉飲酒頌

并序



邑之三老人以書抵余曰太尹郝侯既脩文廟又即學  
宮與士大夫高年行鄉飲酒禮吾三人位列衆賓思有  
以詠歌德化自附於康衢擊壤之謠徒填臆莫克宣也  
先生今奚斯幸賜頌焉余逃虛空谷洒然忻乃作頌曰  
思樂泮水其宮有暉顯允郝侯允恭允烈冬日載陽年  
登既穰惠我黃耆偕之樂康維此官刑自彼虞夏漢增  
唐密靡隙靡罅大明造邦刪定廣施隆之約之與時宜  
之凡我編氓毋或罹咎讀法斯警飲酒斯譽顯允郝侯



惠我以安載詠載歌雅頌不愆侯政有成侯德孔碩敢  
規頌魯用贊無斁

于太守頌

并序

吳元年僕歸自韶陽抵南安始識太守于公民安其政  
士頌其德今四年矣僕與王君子與俱受廣東校文之  
聘舟次九牛驛驛丞王叔衡拜且請曰太守初度猥以  
下僚將躋公堂祝壽幸乃拜先生先生知太守政若德  
焉願賜頌聲用侈太守才賢永永有耀其請勤甚作頌



曰

於惟邦基實重守令慎簡惟賢由天子聖顯顯于侯母  
育此民靡霜靡雹胥為陽春冰蘖之操四年一日官無  
逋逮萊變禾稷太守燕喜天錫難老乾豆麟脯加籩瓜  
棗大庾有巖橫浦安流孰如我侯三壽維儔我興作頌  
其聲肆詡罔俾奚斯專美於魯

樂丘頌

朝列大夫江浙行樞密院判官張光弼先生營壽藏於



西湖赤岸名曰樂丘自為誌銘手錄以示余因作頌于  
其後先生廬陵人在前元時自命曰一笑居士入新朝  
嘗就徵被溫接以老辭歸採天語中號可閑老人其出  
處大致如此其受學出邵庵虞先生之門故其詩超邁  
卓絕高出一世云頌曰

達人大觀物無不可豈惟忘世兼亦忘我猗嗟先生顯  
榮既極贊畫浙省判機樞密功成名遂退然不居一笑  
居士名下匪虛大明啟運勉就徵辟可閑更號天語寵



錫昔者一笑今者可開五福兼全湖山之間湖山赤岸  
營此樂丘有馮有翼以遨以遊趙岐東漢陶潛東晉壽  
藏聿興輓歌繼振古今賢達光照汗青孰與先生自誌  
自銘猗嗟先生邵庵門徒驚人之句媲美於虞照耀乾  
坤黼黻山川我頌樂丘何千萬年

論

通塞論

知通而不知塞貪寵之民也知塞而不知通執一之見



也然則孰為近曰塞而知其通焉不勝於塞通而知其塞焉不流於通斯近矣昔者周時未至殷祀未殄微子殷王元子也非殷士比又非商孫子羣庶比而不待其亡先挹祭器適周由昧者拘者之見則以子不得為孝以臣不得為忠而孔子顧獨以為仁又以為三仁稱首然則孔子非歟微子惟知殷之必不可諫知殷之必亡此知塞也於是去之以存宗祀其心誠有不忍者不謂之塞而知通者乎箕子比干其為紂諸父一也知塞之



不可復通一也比干以諫死為仁人箕子以佯狂為奴  
為仁人亦一也其後箕子為武王陳洪範洪範者堯舜  
禹湯上自羲農相承之大經大法也天將使自我而傳  
不可自我而絕使武王而不傳則無可傳者矣微子誠  
不忍殷家宗祀之無傳箕子誠不忍羲農堯舜禹湯道  
統之無傳其心一也不皆謂之塞而知通可乎箕子封  
於朝鮮迄不臣於武王微子建上公於宋於周為嘉客  
其事又相類不皆謂之知通而不流於通又可乎或曰



伯夷叔齊如之何曰夷齊三仁之節同夷齊之非周猶  
三仁之悼殷其節同其心同而事不必同也後世拘儒  
曲士高揖遜之水下干戈之粟不知微子之宋箕子之  
朝鮮夷齊之西山猶得為殷之土乎抑周土而殷人食  
之也甚者以謂不死敵不為節不罵敵不為節不引決  
自盡不為節夫是數者與將死鼓士死綏社稷之臣死  
社稷封疆之臣死封疆者同固臣子之大分天地之常  
經也然而不皆盡然也聖賢不非也孟津之會諸侯不



期而會者八百皆有社稷封疆之守牧野鷹揚前徒倒戈者皆有死鼓死綏之責此人倫之大變古今之通義也是故比干死於紂非死於周為高節夷齊非周而不食周祿亦為高節微子以存殷祀為高節箕子以陳洪範亦為高節不必皆死孔子不皆避其死通謂之仁仁者全體而死者一節也故知天地之常經斯可正臣子之大分知古今之通義斯可處人倫之大變此惟通而不流塞而不膠者能之吾故表以為論以告夫今之貪



寵與執一者

真率論

君子之為道或出或處或默或語從吾天性之自然安  
吾素履之坦然如是而已從吾天性之自然則自耕桑  
漁釣達之圭冕軒裳各一其天不必齊同而各極其趣  
皆有可悅由妄者之見則謂之真安吾素履之坦然則  
自素富貴貧賤達諸素患難夷狄無入不自得若履平  
地然畧不經意由矯者之情則謂之率真與率固君子



之道也真者其本率者其用真者去妄率者所以行吾  
真也古之人未有樂其性而不安乎素者亦未有素履  
坦坦而汨陳其天真者自夫俗流失世敗壞於是迺有  
蔑禮法踰大防自詭為真者其言曰桀紂性也堯舜偽  
也又有託意傲物為踈為狂為簡為暴自詭以為率其  
言曰靈均獨醒懷沙孰與伯倫荷鍤自隨也則是反中  
庸無忌憚之尤者而世道何賴焉今有人焉當草昧輟  
輟之殷智能奮庸之會策元戎則折衝制勝壯其籌佐



大藩則盤根錯節利其器實相幕則大小材器圓其鈞  
受無不達施無不應人知之者此焉止矣乃其存心殆  
不止是故扁其燕處之室曰真率齋深寓志焉彼為踈  
率為狂率為簡率為暴率者措之於其躬則突出之而  
為用則敗人家國亦惟喪其真故耳昔者范忠宣公司  
馬溫公諸賢謝事居洛為真率之會以自陶寫諸賢勲  
庸紀于太常德澤被乎庶類文章昭乎河漢行義隆乎  
人紀亦從其天性之自然者安其素履之坦然者庸有



二耶徒知諸賢不刻意於飲食燕樂或者意其甚有心於功名竹帛亦烏足窺古人之心哉君之名齋意嘗考於此乎諸君相與賦詠之者亦必出此而後為得余故發其所以然者而記之



海桑集卷三



欽定四庫全書

集部  
海桑集卷四  
五

詳校官編修<sub>臣</sub>翟槐

中書<sub>臣</sub>劉源溥覆勘

總校官庶吉士<sub>臣</sub>倉聖脉

校對官中書<sub>臣</sub>袁文邵

謄錄監生<sub>臣</sub>蕭華



欽定四庫全書

海桑集卷四

明 陳謨 撰

韶州虞帝廟碑

韶郡西北百五里許嶺曰皇岡嶺水曰皇潭水古者於焉廟祀虞帝以故山水胥以皇稱廟莫詳厥初郡志云故老相傳帝常奏樂於邑東磐山上故石號韶而州以韶名或曰帝時巡亦南嶽止耳不狩荒服夔取磬材於



韶至今韶多磬石殆是耶唐謝楚碑云曲江有虞祠率  
誠奠饗棟宇過偪儀刑弗稱元和末刺史張蒙改作清  
廟祠事始嚴楚碑唐長慶元年所樹代不廢祀宋嘉定  
元年提刑廖德明復大新構正南面位建跪坐像臯益  
稷契四臣從焉朱文公為作迎饗送神曲有元之季羣  
不逞倡亂廟落為墟大明啟運金陵建都吳元年信安  
徐公炳文由股肱舊臣擢知韶府嚴明綜核庶政咸理  
百廢具興屬邑稟承民力和裕首復相江書院迺瞻帝



廟大懼明德馨香祇薦無所或寄他宮不亦野哉躬履  
祠基稽度位序斬木陶埏費不鳩民僚佐悉力工勸吏  
勤作貺顯敞盤焉囿焉輪焉奐焉二妃是室四臣就列  
咸復其舊落成之日山增水益松茂栢悅耄穉呼舞嘉  
栗肥香是蒸是饗惟帝陟降在天巡狩在梧神用眷顧  
實茲嘉寵於是郡幕長走書來速文願刻貞石紀徐公  
績垂示久遠謹按傳書言後有作者虞帝弗可及已天  
地之大日月之明亘萬古今圓其覆載私其照臨卒莫



能知其所以為而為之者何也德不可名而功莫能勝計也惟帝盡人之道處變而常盡君之道恭已無為萬代師法萬代祀典神之於赫無乎不在韶雖遠在百粵昔者聲教固暨之矣奚以跡論哉然而祠額翼翼則由唐刺史張公宋提刑廖公迄今太守徐公而已不其難乎其或繼徐公者百世尚之矣是役也洪武二年正月庀工三月畢事門廊殿寢靡不嚴正貳守段原通守蕭隆幕長楊居禮知事程玘實相成之曲江主簿賀元



禮典史晏德明實董營之皆不可不書頌曰

聖禪平陽化流百越其化伊何日用飲食惟此九韶衡  
嶽孺孫皇岡巖巖皇潭沅沅重華邈而韶音尚爾孰為  
亂階蕪煙祠祀顯允徐侯邦之蓋臣受命作牧肅恭神  
人爰作新廟有嚴有翼靈星啟門榆翟端室臣哉隣哉  
巍巍巖廊吁咈都俞復萃一堂顯允徐侯惠民天寵孰  
是炎荒見此垂拱遠徵元和近者嘉定孰與今茲大明  
新運韶治曲江府肅縣勤伐石刻辭紀功廟庭無為之



化萬邦作孚佑我皇家丕隆昌符

興國重修孔子廟碑

洛陽賈侯思復繇明恕廉勤擢知興國縣視篆既月爲  
吳元年求惟將隆化本必厚教基惟是獲上信下悅近  
來遠形之而動神之而宜惟聖訓焉依乃相廟學有其  
廢莫或舉者有其敝莫或改者有其違莫或正者大懼  
無以尊明祀示永久舊制靈星門孔道抵城濠端直平  
豁宋元間民侵沒且百年望宮牆者寃仄由徑不良于



履視前尹屢規復屢沮侯力復之會部使者至民復有  
沮者侯指陳益力使者周觀大是之肆得以聞乃加贊  
焉夾樹仍牆雜植佳木叅差蔽虧外伉揔門丹碧翬騫  
內浚泮池芙蕖槐柳停蔭清漪壓以飛梁俯以亭檻觀  
者改觀兩廡從祀棟宇震凌者易粉墨蕭瑟者與禮殿  
冕服采色彰施削去不度章數等威折從禮典舊有二  
程祠伯子叔子立侍倣先師位改侍坐焉舊闕文昌祠  
規講堂左築宮闕像設焉勒曲阜司寇像于貞石復兵



毀佑文像于廡東籩簋俎豆尊雷坩爵百爾器備肄習  
有齋燕坐有席庖饌有舍祭器有所垣庫者崇薨壓者  
植甃闕者補渠壅者通自一瓦一桷罔或䟽圯此一役  
也侯倡之次年主簿王君繼先寔來聰敏練達併力一  
心贊幕胡君德中相協厥成致完致美邑人聳嘖歎所  
未覩每朔望從僚佐引儒彥談經訂史坐堂上既乃人  
賦詩一躬校工拙屬其不逮以為常聘禮碩師增弟子  
員復其身最其業時與揖讓降升飲食談詠人艷其榮



焉及是校官趙炫者儒李士俊等合辭來謁文刻於石  
惟夫子身雖素王而賢於堯舜位雖大夫而師表百王  
雖不有天下而以萬世為土秦滅棄以覆漢表章以興  
聖曷故焉其教曰君子學道則愛人小人學道則易使  
也有民人社稷者斷斷乎斯其的也已惟賈侯不鄙夷  
其民陶以豈弟動以禮樂均賦役也制役必緣稅制稅  
必緣畝護善良也坐彊梁讎殺者盡殺不恕躬化理也  
訟庭自清竭誠感也甘澤屢降斯可云形愛人之實矣



是邑故產英碩最其尤者唐鍾紹京宋李先之輩蔚為名臣騰耀史冊罔辱聖門今茲濟濟祁祁不尚有繼先哲者乎邑長貳大興廟學茂育菁莪如是厥效必將表著方來是皆在所宜頌頌曰

有文斯廟表茲平川鄒魯是承洙泗是源有倬其道坦坦平平率履以達階之聖垣淪囂沒溷孰清以汰復古之規侯功是賴抑抑賈侯民懷其愛母爾斯爾靡厭靡怠聖門之役羣歡輩超材良工哲巧彈力輸巍巍煌煌



素王之居泮水樂只奚斯頌諸袞袞劍履瑤琚玉藻不  
愆以式其睚肆好八埏流虹垂光講堂孝友張仲來降  
文昌文翁漢代栖筠唐室邁勛旂常興學殊蹟有美平  
川章甫深衣時節春秋蚤夜競持聖訓丕融侯德不替  
刻石廟庭欽于世

銘

退密軒銘

城東陳允中氏扁其燕處之室曰退密軒安城彭君伯



圻為小篆書揭之余嘗坐軒中脩脩有出塵之趣數介  
予為文以自警或曰退密本易大傳語聖人所以知來  
藏往而凡學道者所以的歸者也密在我何事退乎審  
可退也亦可離乎余曰不然彼溺而不知退者外其身  
客其心安覩密之所在哉雖頃刻不能退也苟介然而  
或覺焉身為我有心在時而密幾矣其覺也乃退也豈  
有離合乎哉允中負秀質不幸遭叔季浮湛里閭或出  
而事大夫之賢者終非素志旋復棄去眷初服之未替



植園廬以逃喧賢於殉人殉利者遠甚抑所謂知安分者乎知安分以求退於密進進其有窮乎允中喜曰是吾志也吾方以圖史為佩服花竹為樊牆風月為俎豆江山為朋遊遇會心處即欣然忘倦人未必知也吾之密如是而已蓋將老焉余重嘉其志因序次以記于軒且銘之曰

聖有謨兮藏諸密玩而索之守勿失脫塵羈瞻泰宇引而歸之燕且譽軒有銘兮德是最碩人考槃矢弗告



誠之堂銘

南雄朱氏系出徽國文公有曰克誠者公九世孫也始  
徽國季子在為吏部侍郎吏部之孫澤為南雄司法因  
家焉澤生進士采保昌主簿采生慶克誠高祖慶生旗  
旗生佐佐生允升廣州鹽司幕克誠世南雄之業讀徽  
國之書扁其堂曰誠之求予銘以自勗予因為求金華  
吳廷碩小篆書之而銘諸下方云銘曰

周子曰誠無為然則誠之者殆有為乎又曰聖誠而已



矣然則賢其誠之者乎先正指歸會于徽國明善由於擇善誠身在乎固執是持是循有嚴有翼美哉克誠乎子先正之後也尚佩服乾乾而勿失

### 德生堂銘

古昇劉德亨名醫也以德生名堂德之者衆矣吾故賞而銘之曰

天地之德曰生而已有生之類莫大乎人天地不徒生也必生百物以養其身不徒養其身也必生百藥以驅



其客邪而完天真凡穀粟絲枲牲牢醴酪一日不可少  
與輕而飲食男女五聲五色所以為生亦所以戕生於  
是草木之英獸石之精毒如堇荼仁若參苓賤至於牛  
溲馬渤貴取夫丹砂空青苟善遇之皆足起人於垂死  
而壯之顏齡此古者良醫師所以握化機而並行賢哉  
劉君善攻堅如王翦不責報如宋清我銘其堂用勗永  
貞將來裔繩繩而食舊德且與古人奕奕而垂令名也

安安齋銘



讀望之之文宏博淵深非始學意見所及然進為之方則固引而未發也記曰安安而能遷乃君子入德之事請以為安道勉乃銘之曰

我觀風雷震奮飄激其在于經為恒為益恒者安身立不易方益者遷善不循故常非恒無益能安必遷進脩德業罔或容偏有美君子在彼林谷矢志安安心心之最敢詔一詞見賢思齊三人同行必有我師勿吝勿驕勿封勿閉動靜皆安喧寂無異恒益二象請圖諸壁惟



視斯語以永昕夕

何侯廟鐘銘

侯自元朝至元丙子內附之初來監治西昌實能父母其民保障其土故能廟食于茲百歲益虔彤鬯感通震於遠邇禮云禦大災捍大患則祀之惟侯有焉先是廟有鐘鼓嚴祀朝夕洪武之初鐘毀不存十七年衆善集力興是範圍鳧氏告功非銘不永銘曰

惟侯之民功亦既銘于鼎鐘惟侯之廟貌非鐘不震耀



鏗鐃鏜鎔金聲烈烈匪惟侯威益彰厥德既鼓于宮亦  
聞于野侯之出入有肅其駕彼蒲牢之吼徒警于海隅  
曷若此音輯定我民居侯有甘棠蔽芾于西昌我銘此  
鐘千載不忘

### 東窓銘

天之元氣實萌於東東者生方萬物之宗人之生意皆  
本於仁仁者人心衆善之根有美君子爲里之望以道  
牖民其居東嚮東方漸明旦氣最清我則挹之穆穆以



澄月出東方金龜有耀返我靈臺圓光湛照維伯循氏  
氣志內降歛此萬慮泰然一窻筆床繭紙竹簡韋編有  
朋有徒以日以年我銘座右敢勗日新聖有訓言修道  
以仁

括囊齋銘

慈湖楊先生之孫孟禮以括囊名其居求其銘於予以  
自勗焉夫括囊於坤六四之時而有無咎無譽之美可  
也然當不言不笑不取之際所以括其囊則然矣而時



然後言笑與取則囊之括豈固不出哉所以括者時也  
所以出之者亦時也余懼其膠於一而不知因其宜以  
求適中故為之銘曰

士之所難泛應無節苟有弗安我囊斯括其括伊何萬  
象包羅溟滓無形孰識少多千歲非遠頃刻在茲散斂  
無跡變化神機條焉而括忽焉而啟啟之以時括亦在  
是有括無啟執一不通有啟無括流俗之庸君子存誠  
與天同運坎止流行物來順應敢贊一辭刻於高堂敬



恭朝夕是為括囊

傳

乘槎客傳

客江浙奇士姓張氏字安國隱居翫易窮變極數別自  
玄悟值天下雲擾不能俯仰抹撒深自韜抑寄跡卜肆  
中假六書文推人禍福吉吉凶輒先處其時輒不爽  
所至座常滿適相遭建業相與論易其言曰易卦興而  
結繩廢為人文太初卦即書之形書則卦之畫而縱橫



旁午曲折之中古由籀變篆分隸後世變楷行草則加之波戈飄瞥以就簡便爾實皆卦之支也吾第考書之文與數以起卦渙然契矣昔者聖人觀河圖以作易程子因見賣兔者以為觀此亦可畫卦不但河圖也然則何者不可卦乎書文點畫形象古今不甚殊而人心匠經緯布結䟽密妍醜人人殊禮所云禍福將至動乎四體者書尤可驗吾數亦奇中以此吾游藝於道其幾哉且夫崎嶇歷落者游俠之常態也麾斥汗漫者賢達之



高致也博望侯乘靈槎犯斗牛取天孫支機片石而還  
奇事奇事六合之外聖人存而不論政此類爾吾故自  
況曰乘槎客云僕行四方所見聞傳聞以易數名多矣  
皆並緣易理時亦弋獲皆未若客奇中者乃傳其事以  
覺來者贊曰聖人作易精可通神明之德粗可類萬物  
之情其用亦然矧幾者動之微吉凶之先見乎然惟可  
與神遊八極之表者為能與於此博望侯窮河源歷崑  
崙以超遙於銀潢天津世俗疑焉達者信之且嚴君平



不啻遊乎不然支機片石烏能識之哉後世如郭景純  
張茂先李淳風穆伯長輩皆嘗客槎上皆深於易者也  
若張安國氏知之者蓋寡矣世所知者徒藝焉止耳至  
若槎上之趣藝不足以云烏乎賢哉

康母陳氏貞節傳

節婦姓陳氏名端生延祐四年丁巳年二十歸康氏仁  
安歸之二年生子德昭又三年喪夫孀獨居窮者凡七  
十年始終守節如一日當夫亡時所親竊議曰此紅顏



玉質寧堪晝哭耶節婦聞即仰天泣誓曰為婦而棄姑以負所天義與審然覆載所不容矣事姑益謹凡可以備養者傾其奩中不吝苟可以資身者左右承順無方下至補紉浣濯不以付婢子養姑十三年而姑亡喪不憊禮葬不踰期平日內睦姻族外和鄰保行止端莊無瑕玷前後所居凡經數燬拮据興葺皆以加前子雖幼孤訓育使士嘗禱于天曰願保此子庶妻有托當四方盜起節婦能先幾半夜走遁巖穴已而盜果入城獨舉



其家得全自是終身無恙矣大明洪武十六年江西提  
刑按察司試僉事翁師善行縣首訪節義父老即以陳  
氏舉僉事庶得其實遂以聞十七年禮部移江西布政  
司司委吉安府知府陳茂材勦覈再申十九年得行移  
旌表縣令徐伯敏奉旨惟恭即日樹臬建表於康氏門  
外署曰旌表康仁安妻陳氏貞節之門遵國典也節婦  
之大父叔賢以醫名世為醫學教諭父仁可鄉稱善人  
實泰和官族子德昭能讀書隱德以儒發身稱于時孫



二人皆賢秀曾孫一人嗚呼節婦生長前代老於天朝  
享有色養惋愉而孫曾雅雅娛膝下可謂之備福也已  
至若獨膺國寵表此一門雖金花鸞詒何以易此則榮  
之至也贊曰

惟節婦陳淑惠清貞族出潁川歸于康門其出其歸德  
門巍巍一子二孫流光遠芬傳德無窮視此貞文

說

學研說



古者四民士處一農處二豈不以士尊於農乎曰非也  
甫田詩云烝我耄士管子云農處野不暱其秀民之能  
為士者必是賴也然則士出於農工商不敢與齒豈曰  
尊於農乎特士之得名以學農之得名以耕耕與學理  
同事異二者可以得兼者將古之民歟二者罕能以兼  
之者抑今之民歟由其理之同故聖賢每以耕喻學由  
其事之異故後世或貴士而賤農昔夫子之言曰君子  
謀道不謀食蓋學所以謀道猶耕所以謀食也學非以



求祿猶耕非以求餒也然而祿與餒不求而自至則是君子謀道者憂不得乎道也不謀食者不憂去其貧也勉其在我者而聽其天者耳孟氏之論仁亦取類於五穀萁稗凡此皆以畊喻學其理甚明自貴賤之勢懸朝野之塗分富貴之極反以田舍翁誚其祖父者有矣吾讀豳風豳雅豳頌國脉民命所繫至重夫孰得而賤農哉不賤農所以貴士也仁玉康氏有令子曰以忠質粹而氣冲謙已而下賢佩服圖史乾乾以終日起居甘旨



婉婉而承顏扁其堂曰學耕之堂予嘉其好尚而欲納諸大成也本聖賢之訓而原夫學與耕同一理考古今之判而要諸士與農同一初用以廣其志焉作學耕說以貽之

聞人錫字說

大聖治水洛吐神苞疇興範啟人文敷朗繇墳典以降天錫禹一初也王訪箕子又一初也微禹莫能受諸天微箕子莫能垂諸後治天下大經大法具是悉矣聞人



氏彥芳有大丈夫子覽揆之初命名曰錫既加元服字以禹疇殆使其棄幼志景聖謨成令德也錫重予執友求衍其義以自勗惟是九疇既叙入德具焉稽諸禮經人生十年曰幼幼斯學二十曰弱弱斯冠幼與弱其間離小學升大學則學脩齊治平之道較之箕範要歸在皇極本根由五事而五事又本於敬敬則五事脩而身正身正而天人合福祿備其道一致錫乎勉之哉雖箕陳武受匪臣民是為然天子庶人一本於脩身堯舜君



民事業存乎畎畝射必志鵠蒙養作聖理豈二歟錫乎  
勉之哉漢儒專以災異驗洪範夷禹箕於星史更千百  
年及朱蔡始復大明而父以是名以是字不徒然也而  
必敬宗而父之命若書及範是訓是行日三復不啻多  
將四十強五十艾方物出謀發慮以服一官之政致皇  
極之君以福歸極之民無媿臣道斯無媿子道而成人  
之責盡矣錫乎勉之哉

貞白說



貞白生年甚富學甚勛事親讀書外乃至雜家衆技悉  
獵取其華惟是之歸處身恒以智恬不苟止妄隨別字  
貞白生來請其說余惟貞白者天然之白也天然之白  
義農堯舜孔子顏孟與我同然也匪直與我同然古今  
天下人心秉彛好德者舉皆同然也自昔經傳言貞莫  
尚於易論曰莫辨於鄒孟氏夫貞正也易利貞不貞不  
利又為貞固堅守故又有不可貞不可疾貞者焉又為  
久而常故又有貞觀貞明貞一者焉殆以凡貞者必固



守其正則可久而常耳禮曰白受采言忠信可以學禮  
白以喻質也獨孟氏不然因告子外義折以白馬白人  
因告子生之謂性折以白羽之白白雪之白白玉之白  
白以喻性也天地之性人為貴猶玉之不可賤也玉負  
其天然之白水火不能變塵滓不能干猶人負其本然  
之性大行不加窮居不損也君子之學求以全乎是而  
已矣全乎是者義農堯舜孔子顏孟之所同也故自然  
者聖哲也勉焉者希聖也清明在躬而不容利欲入之



夜氣所存而毋致旦晝梏之吾知貞以守吾白耳豈不和順內積而光輝日新也哉吾子意殆在茲乎吾又聞古有陶隱君潔身完節以處叔世德學著述師表百代毋論方內外想見其人自命曰貞白先生陶公真能守其天然之白而不辱者耶吾子意將尚華陽乎未可知也併以為說焉

鄒律伯春字說

瓠巴鼓瑟而游魚出聽伯牙鼓琴而六馬仰秣鄒衍吹



律而寒谷回春聲之和能召氣之和氣之和能感物之和固其理也府學生員鄒氏名律字伯春昔劉向說苑云燕有寒谷不生黍稷鄒衍吹律暖氣隨至草木皆生故取以命名而求予說以自勉夫以寒谷而吹暖律非黃鍾之宮乎黃鍾子律非春也而實為春之始故吹之而暖氣應焉不寧惟是六陽律自太簇至無射皆黃鍾也六陰律自大呂至林鍾亦黃鍾也皆足以致和也且元氣流和貫金石塞宇宙窮巖險靡不被及而寒谷猶



自外於化育焉乃橐籥一鼓百物自生聖人制律有功於天地如此哉雖然黃鐘為春之始於時為春則於人為仁黃鐘為十二律根本春為四時根本仁為萬善根本也君子之學亦求仁而已矣伯春誠能由律之和以見天地之春由春之德以識吾心之仁涵養其本原當主於靜省察其身心不流於欲出入起居無不適於正周旋規矩無不中夫節脩於家即所以施於國厚於己即所以及於人將見推律之用上達於郊廟神人之際



廣律之功下及於昆蟲草木之微而仁之功用極矣又  
豈特一器一物之感召游魚出而六馬仰哉伯春妙齡  
而美質積學而勤脩吾故以遠大期之以德業勉之庶  
其常有以自激云

敬輿說

余聞風不厚不能負大翼水不厚不能負大舟君子之  
學不厚不能舉大德善脩德者莫如勤禮善勤禮者莫  
如盡敬昔者夫子教顏淵克己必曰復禮語仲由為國



必曰以禮由也而達此則可幾堯舜氣象回也力能任之則其效至於一日天下歸仁此脩德者莫如勤禮也昔者北宮文子見令尹圍不能敬其威儀以為無威儀者不可以人在人上令尹其將不免成肅公受賑于社不敬劉康公以為人受天地之中以生能者養之以福不能者敗以取禍而有以知成子之必不反也此勤禮者莫如盡敬也故子思子之言曰敦厚以崇禮而內史過則曰禮國之幹也敬禮之興也余宗弟厚字崇禮既取



子思子之意以自命而其友生又取內史過之語勉而進之別字曰敬輿今受命襄陽界行來徵余說子謂勤禮盡敬皆非敦厚者不能子既允知之矣然敬其本也人知敬者禮之所以立而豈知敬者禮之輿哉大抵人能弘道道不能弘人凡三千三百之目所以為天理之節文人事之儀則者苟無其敬禮不虛行故輿者所以載禮而行之者也崇禮資稟冲粹而持之以謙才識優長而充之以學不惟敦厚於禮抑且敦厚於敬其為輿



也。大矣其能舉德也。信矣。繼今以往。進顯要而大用於時。所以定親疎而決嫌疑。明是非而別同異。下而分爭辨訟。教訓正俗。上而班朝治軍。蒞官行法。大而禱祠祭祀。供給鬼神。孰有一不本於禮者乎。孰有一不由敬載而行之者乎。子勉之。子勉之。

海桑集卷四



欽定四庫全書

海桑集卷五

明 陳謨 撰

序

贈趙文學序

臨川趙文學字德容源深於玉牒學粹於四詩僑寓番禺有年而慈闈故留臨川嘗負米數千里外且逮養於斗升之祿矣然未以為太夫人榮也洪武四年秋番禺試藝者若而人若書易若春秋與計偕者累累而是



而以詩貢者獨文學一人焉嗚呼異哉然則其素所蘊蓄可徵也已臨川之多士有不稱願以壽其太夫人曰幸哉有子乎今而赴禮闈取高科登膺仕太夫人在堂不曰是能嗣續不辱其世者乎番禺之經生不曰正葩之學不當如趙君乎雖然文學不鄙余老而求贈言余既嘉其已獲者足以榮其親而尤願望其立於位者深足以為親榮也是以叙其卷端

贈進士羅子理序



羅倫子理舉進士上春官余嘉其堅窮苦節智日益明  
足以受任而堪事則告之曰士尚志而已志不苟則學  
充學不苟則行達凡苟其行事以速官謗者其志其學  
蓋蔑如矣昔者運遭叔季事在輻輳談經者絕響于時  
衆廢而已獨業衆譁而已獨持得二人焉其一楊自立  
子淵家於春秋其一倫也家於易二人志同學同行同  
且誓將無不同者洪武三年子淵誕先甲科入贊天官  
聲實表灼每重王貢之嘆而倫亦次年奮於暫蹶及於



先鞭誠不負初志者嗚呼倫也尚勗之哉由三十寒暑  
布衣昆弟講切之勤一旦蟬聯玉映以明經顯聞于時  
非偶然倖致者比而弗加勗可乎吾聞倫始祖希五代  
時繇金陵徙泰和凡幾傳至宋大觀間曰吉成贈致政  
生三子次伯壽擢第官盧溝主簿嘗割股起親疾以孝  
聞官易其所居坊曰旌孝坊事載郡志季伯霖有隱德  
狀元張槐應與交莫逆倫其曾孫也盧溝府君逮倫纔  
四世傳不云乎必復其始詩不云乎無念爾祖倫往矣



尚勗之哉前之窮養者無或苟矣後之達施者宜無一  
可苟展也子淵幸以鄙辭質諸其以為否邪抑然邪

鮑參軍集序

總制俞公子懋刻鮑參軍集於懋齋介僕叙言叙曰參  
軍名照字明遠照或作昭則唐諱武后而改之也宋文  
帝元嘉中參臨川王義慶軍事時太尉袁淑文冠一時  
王請為衛軍諮議照與同列號為極選然則古之摯任  
間外籌策幕中率多名勝之士若參軍者尤風流文雅



傑出等夷者歟考諸大雅有曰文武吉甫美其文足以  
附衆而武足以威敵也而或者角文武兩途互相詆訾  
豈通人之論哉今觀俞公鎮撫永新威德並著顯有吉  
甫之風而平居暇日雅喜詠叅軍詩殆曠百世而相與  
友矣嗟夫唐以來詩人唯李杜為大宗然至少陵贊白  
也無敵則獨舉叅軍之俊逸婉焉夫俊可能也逸為難  
俊如文禽逸如豪鷹凡能粲然如繁星之麗天而不能  
迴狂瀾障百川者以能俊而不能逸故爾史稱照古樂



府文極道麗道斯逸矣麗斯俊矣微少陵不足以知太白微太白不足以擬參軍也雖然文以氣為主以意為輔以辭為衛讀斯集者翫參軍之辭必求其意求參軍之意必尚其氣始參軍謁王欲貢詩言志或難之勃然曰千載上英才異士沉沒不聞者安可數哉大丈夫蘊蓄智能可使蘭艾不辨與燕雀相隨乎即奏詩王大奇之此其氣何如也蘇子曰方高力士用事公卿爭下之願出其門而太白使之脫鞵殿上此其氣已蓋天下矣



此太白所以配叅軍也善觀者其亦有取於斯

贈楊員外序

為士而由進士發身天下之清流也為進士而獲班朝  
署天下之極選也以天下之清流膺天下之極選幾何  
人哉有能濟茲者充而達之若內及外其於為政也何  
有楊君子吾洪武三年進士也既取高科即登吏部勤  
謹而和緩練習而疏通凡天官之屬藻鑑精覈樞機周  
密曹務劇而咸理敷奏明而常允者君以主事之賢書



諾居多以故令聞尤著洪武五年諸蕃宣大臣類以幕  
府關員為請上乃命中書遴選省屬往承其乏而君以  
選陞廣東省員外郎九月抵家第展墳墓即就道僕請  
贈以言夫服領以南方面之重控制海表國朝平定其  
地斬伐鯨鯢擁護良善使蜚鱗鮫人之室胥為輸賦納  
貢之區然而地大物夥不尚有當興除利病者乎化暴  
鑄頑莫若尊賢興學今茲連歲大比多士賓興與內郡  
等夫其雲蒸而雷動鯤從而鵬飛者良由聲教之漸被



者深也然而不尚有當振厲鼓舞者乎行矣子吾推其所以贊治天官者而悉心以佐理藩府可也吾見總總焉其有餘裕穆穆焉其揚休光而毋徒重內而輕外毋以昔之勞而今益勞也夫孰不曰進士之施無不達如此進士之賢能不負所學如此又孰不曰廟堂之登明選公如此廟堂之嘉惠藩服而慎簡乃僚如此然則政譽溢於途而官歲垂於範矣顧不偉歟

贈進士周淵序



周淵字彥容年甚富質甚清學甚劬洪武五年秋余忝  
校文江西及開榜而淵以詩經舉進士省憲大臣聳嘖  
矜賞曰是我南昌府學生也老成者或媿之矣其冬淵  
來西昌受室於浩溪驛丞之館丞俎豆余淵相從連日  
動如禮法私心甚慶昔徒得其文而今迺得其人焉將  
上春官且求贈言余自顧無足以補吾子所需也誦先  
正之格言資遠業之良輔昔河南程夫子以少年登高  
科及有高才能文章為人之不幸夫高科未易得也在



少年尤為榮寵然苟幸得之即肆然不啻過人祿利是  
狗而道德之弗圖名譽是崇而官謗之弗恤則少年高  
科固以榮之亦以累之固以寵之亦以損之非幸也韓  
子曰夫天輕與人以富貴而重與人以文章言高才固  
造物之所靳也上焉以載道其次以華國其次以文身  
上下古今落落數人耳若其本實撥而枝峻茂行荒穢  
而思藻潔政復剝雲錦於天機軼翡翠於蘭茝如王楊  
盧駱猶不逃裴行儉之誚亦何幸乎爾也今吾子年甚



富足以道遠質甚清足以絕俗學甚劬足以有成其取  
高科也必矣其文章當水涌而山出矣將之以廉勤而  
持之以謙撝厚其本於孝友而達其行於政事兼夫人  
之所難而無程夫子之所病則余之所願望也於是乎  
言

鄉飲酒讀法詩序

國朝奄有方夏即詳定法書名曰大明律令又命刑部  
取凡麗於法者類編其書名曰申明誠諭尤慮中外遠



邇弗加警懼輕犯憲條申命文武百司歲取春冬孟月  
行鄉飲酒禮而讀法焉民間率百戶為一集位以齒董  
以里長郡縣則肅士大夫之老者為正賓餘為次賓而  
郡守縣令主其席其儀酌取唐宋而務從其簡物貴儉  
素而務適其中凡飲皆先讀法然後行酒所以使人人  
知畏而重犯法人人知秩卑尊而隆齒德也洪武六年  
正月實維其時泰和縣令尹前御史劉公宗啓即學宮  
而行事自僚佐暨賢士學官弟子員等凡若而人列位



於明德之堂於是學徒二三人于而前正立張拱奉法  
書而更讀之先令次律次誡諭炳炳琅琅觀者如堵聽  
者動色讀已而燕籩豆靜嘉衣冠嚴翼竟酒爵行無算  
有充然飽德之實無起座誼譁之失皆額手頌曰此主  
上之澤也令尹之化也令尹治縣克勤克廉端其教不  
鄙夷其民勤如禮法民自以不犯其或觀感信向有不  
齊名隸申明籍中不惟其所親所友悚聞誦言面頸發  
赤雖其怨家聞之亦凜然增唏恨服化之晚誠足以增



夫天理民彝之重豈徒飲云乎哉抑刑始於笞笞始於  
十至輕也遞遞倍之至於杖又遞遞倍之杖至於百何  
笞律簡杖律繁笞十良民猶不敢犯杖百而犯者益衆  
然則法可不重乎徒輕而流重流至於三千里極矣又  
加焉非絞即斬而率輕犯之此國朝所深憫而鄉飲讀  
法之制所以行也嗚呼仁哉翼日學官自強成詩會稽  
中常先生和之諸在燕者或賡吟或自賦以質諸令尹  
謂余忝正賓宜為序遂次第書於卷端



贈劉侯朝京篇

上方圖任舊人共政凡越在外服大小文武百司者憫  
其勞於王師既渡之日優其渥於王化大行之時悉還  
其人於朝使咸得宣力於家咸得不享天休而欽承德  
意不欲外股肱心膂為異體也知泰和縣劉侯宗啓實  
惟舊人之通顯者既歷尚寶卿監察御史遂出宰百里  
在官三年庶政備舉百廢具興洪武六年三月制以平  
陽郝侯思讓為交代行省則承命趣劉侯朝京郝侯既



視篆遣吏來謁文為贈余讀商書所貴乎用舊者蓋曰  
王播告之修不匿厥指言凡所播告則奉承於內而能  
不隱匿其指意以達於四方也又曰罔有逸言民用丕  
變言宣化於外則無過逸之言以惑衆聽故民用大變  
而化服也又嘗觀詩人美仲山甫既稱其柔嘉維則小  
翼翼威儀是力又稱其天子是若明命使賦出納王  
命王之喉舌凡仲山甫之德業劉侯蓋有之似之今其  
歸也其能奉承於內也審矣其能宣化於外也必矣然



則用舊以圖治商人豈得專美於前哉請以是為贈

劉處士赴京篇

處士劉仙客應徵而起客賀者曰君仙客也仙者恒遺世亦容有世不我遺出而效用於當時若張良李泌之於漢唐也不其偉哉又曰公卿交相辟士務舉爾所知冀必得其人獨舉君者非有半面之雅一臂之交然則君之令聞廣譽其徵不亦遠歟客語竟處士若有不懌然者曰吾行安敢負所學誠懼弗堪任耳柰何僕曰窮



養而達施正已以待物將焉懼邪抑客語則然請復有  
以為祝詩不云乎鶴鳴于九臯聲聞于天言隱不能藏  
也易不云乎中孚豚魚吉象曰信及豚魚言信無不達  
也處士負山東勁氣讀書青原山下孝友出天性刻苦  
以養母終身不娶母八十餘歿廬墓以終制焉節操如  
徐穉非其力不食居止如王凝一物不苟亂所交皆名  
流所談皆讜論謂之鶴鳴于九臯者非邪其聲清亮聞  
八九里雖欲不聞於天其可得邪且夫孚信之道可以



通神明貫金石守之乎終身如南山不騫不崩行之乎  
四時如松栢不改柯易葉斯以獲上治下無不孚矣彼  
豚魚至冥也猶足以感之況至著者乎頑然塊然也猶  
若有知況其有四端萬善者乎故隱處之不能藏也出  
而為用惟誠信無往而不自得固處士所素定者直推  
而放之耳嗚呼當道審於求賢何待夫先容於人處士  
深於藏器何有乎獨善於已行且朝奏暮召有見晚之  
嘆彼嚴徐者烏得專美於前哉



王氏近代族譜序

王氏近代族譜并自序者王以誠之所作也凡譜必原極夫得姓受氏之初而今僅僅至於五世者何譜牒亡逸概得於家訓畧其所不可知也其自序何庶後來者之猶可徵也自序而必本諸相國待制制置節制者何端緒可尋源委之求也始啓宗自金陵來為吉州校官因家白下子仲柔舉鄉貢進士於以誠為高祖仲柔孫榮叔曾孫時可則以誠祖若父也榮叔治儒術有理才



當有元延祐間贛寧都蔡冠之亂州疆起之抑使就吏  
給軍府贛之俗鬼寧都城外有妖祠像設極魔恠人莫  
敢側目土人類縛生口以祭甚神之我軍畏縮榮叔獨  
奮義火之三火三滅乃命取婦之褻衣幕神首一火而  
燼遂平其城歸補押錄役滿不干進養閑恬處喜讀四  
書間憇東禪寺槐安閣見寒山拾得詩尤酷嗜之時可  
資質淳厚隱居授徒晚從普覺老衲聽受戒律斷酒葷  
日誦法華經以此自終有賢子伯天祐仲以誠皆兼習



儒吏季以立嗜古學開家塾鼓篋滿堂精厚訓誨不倦  
嗚呼校官貢士上不辱相國三制之宗榮叔時可下將  
啓八世莫京之祚斯譜也雖不能遠稽亦足以垂示無  
窮矣吾故因以誠自序而復述其祖父之可稱者如此  
又以期以誠昆弟之後光遠而有耀也

一蓬春雨軒序

一蓬春雨軒者會稽中常陳先生之所寄也曷為而寄  
之燕遊之所也燕遊而曷為以是名之身雖家林一畝



興則江湖千里也夫人不出戶庭則不知有舟居之為  
樂不病暑暍則不知有甘澍之為澤先生營是軒雜蒔  
花卉左右圖書風晨月夕茶烟香篆竒古之玩好絕俗  
之名流日相與嬉娛其間詎蓬窓之可擬而風雨之攸  
宜哉然而處一軒之靜飄飄然有麾斥八極之氣春雨  
時至波濤驟驚灑灑乎在三江七澤之間此其興趣之  
遠視一蓬奚擇哉先生為前朝逸民交遊貴公鉅人無  
不可為是軒留詠者其來廬陵謂予曰吾夢寐軒中珠



玉嘻亡之矣間記憶十之一二數數誦以貺予又錄以示曰幸為序志之將續有題者嗟夫軒寄也軒之名亦寄也遊夫是軒者又寄也軒之珠玉獨非寄乎今而其人往其詩存則篇什之寄所係者遠宜先生之眷眷不忘也軒其不以是而永存乎

羅觀泰歸南安序

羅君觀泰當至正間以才膺當道之選辟為南安屬縣巡徼在職以能稱然非其志也是時四方雲擾君既書



滿即客土小溪為家甚安適焉余嘗避地旅韶州又嘗  
校文入廣東皆道經小溪凡再物色君隱處然皆覲面  
九疑莫能得也去年君來展桑梓省松楸始諧言面蓋  
去鄉十七八載矣傾寫無何解憂在念嚴君從禮率朋  
徒賦詩以贈屬余序之古之君子重違其鄉仁也然而  
不獲其志者宜亦不少伯夷太公之居於海濱豈其心  
哉後世或以羈旅或以仕宦得其所願者或不暇歸不  
得所願者欲歸而無由吾見多矣若余之甘衡門守環



卷五  
堵今吾猶故吾固碌碌無足道如觀秦之小溪誠所謂  
他鄉勝故鄉邪惜乎曩時不得一造竹所而徒想像其  
高致也故於其別序以申之

為歐陽志學謝醫序

友人歐陽志學別數歲始一會相勞苦外察其貌始若  
戚如中乃憚如而終則浩浩如也志學於文忠公為十  
四世先賢之澤逾遠而長固自與人殊昔文忠公為州  
學記所以願望於吉士者以為將見皆道德明秀而可



為名公卿其后終宋祚三百年終元祚百年為士者誠  
不負公所期待矣孰謂公十四世若志學之賢乃壹鬱  
栖屑祗爾邪此其貌之戚如宜也乃告子曰今年有以  
名薦達者州司有星火之迫而老母八十又六吾何行  
如之已而嬰疾老母亦疾私自念天其以疾全我使終  
養乎又自念天疾吾身可也而併疾吾母將焉濟乎得  
世醫朱氏德輝為施療治按脉而證符投劑而邪卻身  
與母俱寧而公與私兩釋此吾所以懌如也朱君年不



滿三十而方術已如此殊可尚已使予不幸而不遇疾  
予其行乎故予之疾天也使予疾不得朱氏而落於庸  
工是天將全之適以戕之也故予之遇朱氏亦天也予  
德朱氏而朱氏慕先生之文先生忍能靳一言乎又曰  
繼今以往終吾年齒浩浩乎日有餘裕石田茅屋得為  
幸民啜菽飲水言報春輝訓迪後人志文忠公之志學  
文忠公之學以期垂於無窮又將與德輝之世莫與京  
也余聞志學言誠君子哉因書以謝朱氏



張子靜樂府序

始予得張子靜靈宮樂部曲四章而讀之愛其兼有麗  
情團扇花間之趣且辭翰俱美恨不識其人意非今時  
耳目所及也暨物色解后則吾廬陵先輩也僅僅交一  
臂而去嘗恨不得其全集而讀之茲復聚首乃辱以集  
為貺桂隱聞廷二劉先生序其端矣極所推服予晝簾  
夜燭把玩不能釋手子靜復介予題辭嗚呼予七十又  
二子靜踰八望九矣三影之韻度于湖之俠氣尚往來



於心不尚可徵乎當其壯遊武昌我龍洲道人神交物  
表買桂花上南樓載酒黃鶴磯下少年俊邁蓋可想見  
今具存集中惜無好事者刻梓以傳徒使四方見其一  
二者以為古人也昔留侯佐漢服其籌策者以為必雄  
傑偉丈夫也及見則如美婦人焉讀子靜詞孰不曰此  
月下秦淮花前晏小山也抑有知其皤然雪顛歎然  
窶人癯然列仙者乎吾又以子靜盛年不偶於場屋安  
知其中無留侯之所存哉若留侯者方益斂其華擊節



於大風之歌彼其蒼蔚朝濟婉孌斯饑國風之傷楚騷  
之怨蓋未嘗一介懷抱則吾子靜獨擅之嗚呼世道之  
感歎歔噓其不在是哉

周石初集序

石初周先生負奇氣抱碩學卒困躋不偶其窮益堅而  
文益壯吾雖不識嘗得其著作一二於他許相識已多  
乃今其門人張彥文編集其亂離諸作彙成巨帙以借  
予讀之且曰石初知先生幸為我序之嗚呼廬陵之文



自歐公倡之乃天下之文也名家繼作迄宋終元皆歐門股肱心膂之臣而或者妄肆臆點染雌黃其間君子所不較也近年得歐槩矧而精彩益出者莫如虞先生自餘亦安得瞠若乎廬陵哉石初之文成之劉公序之至矣復奚容贊雖然石初有三幸焉當有元盛時獨不利場屋一也至正之季所在化豺狼雖間道暫時而康莊不失今歸然靈光獨存二也江南野史誰復健筆而集中隱約散見皆可為國史補三也使石初幸乃溷



一第不幸逢時不祥必將矯矯令節必不泯忍心倪為  
名教羞然位與勢之相侔志與才之相協有不可必者  
固不如昭文之不鼓也白髮殘年坐籌海屋殆有陰相  
之福詩不云乎不愁遺一老宰物者其愁遺之矣必將  
有傳于后昔賢稱杜詩似史記豈不以天寶以來間事  
不得少陵載而傳之安能如畫此史傳所不及也吾於  
石初之詩亦云

仲氏斐藁序



洪武六年夏予仲氏以靜由贛之興國寓籍以儒行起  
取赴京師偕起者凡若而人既抵京咸放還鄉獨留仲  
氏辭不獲且病久之病甚當道者憐而許之九月歸舟  
抵青原與予再會拜且泣如再世如夢語予飲泣相勞  
苦銜杯酒接殷勤不能數日遄返興國留詩一帙畀予  
評之嗚呼自至正壬辰亂起東西避寇率相違違不久  
率合并自丙午余旅韶由韶徵赴建業叅差胡越莫此之  
甚今幸乃得各還為民然白頭相望故園之念深聽雨



之懷愴矣讀集中諸詩皆森削束程度婉婉有思致工巧而不失正大和平而時有譏切至如詠物數處復能於物外賦物不刻畫而切事情若一二長篇如鳩巢癡可鍼末俗花村酒帘等甚可諷誦予皆一一評訂之矣何時尋遂初之賦歸善和之里相與觴詠賡酬以樂桑榆之景庸非快事計造物亦未必不見許也姑序以志因養吾鄧先生行附以達諸是歲臘月書于青原之寓陳謨一德甫



流芳集序

胡氏志櫟以其流芳集示余曰將入梓以垂後而先生未蒙序識之敢請余受而閱之自其遠祖箋箋父誥暨其曾大父士茂父履輝季父履寧履寧子志德代有積慶其擅芳也宜哉夫芳之大者在乎祚胤祚胤賢而聲實茂綿厯永矣然德其本歟故有茂德之咎而無背德之祥者此也始箋由太學舉進士丞南城當紹熙五年逢國大慶高年者錫爵得封其父誥迪功郎母歐陽氏



孺人讀尚書謝公諤為謚記其儒林精舍寶謨閣直學  
士楊公萬里為箋記其福榮堂其德可知此流芳之初  
也士茂一字古澗止一子能均其產畀兄子三而四分  
之能製尊禮堂以嚴家訓觀鄉衮信國文公鄉先生太  
傳劉公往還手筆墨蹟如新其人可知此流芳之盛也  
履輝一字澗月履寧一字小隱草廬吳文正公麟洲龍  
先生諸老皆為賦澗月堂太守楊友直馬昂夫諸賢皆  
為賦小隱堂而太史虞公又為序之此流芳之續也志



檄承之當草昧之運能糾民義障鄉鄰致世業不隳益  
崇能拜前江浙提學李公祁乞銘其父前陝西省郎中  
梁公天與乞銘其母今翰林國史宋公濂乞銘其妻致  
幽壤不憾有光而志德習隱如其父好文撝謙如其父  
此流芳之衍也然則胡氏之芳其繼繼庸有艾乎昔范  
宣子論死而不朽歸諸世祿叔孫豹以世祿不可為不  
朽蓋尚德之論也凡胡氏賢子孫思其高曾而上由紹  
熙迄今百七八十年數遺之休貽謀之善若先達之士



名公鉅人立言之君子實寵嘉之如是豈易得哉然則  
樹德尚益務滋乎吾見流芳不但一宗一鄉而止將叔  
孫子所謂不朽者可躋矣

倪貳守之鬱林序

化州石城貳令廬陵倪仲威擢陞鬱林貳守吉郡總制  
顧侯文質作為詩章艷其寵榮勉其清修而竚乎其令  
聞之遠揚也郡庠師賓士友率皆賦贈而僕則序以致  
祝規焉當洪武三年廣東秋闈僕忝校文而君職封彌



相與頗習熟然僅僅月餘而別別又五年始再會會無  
幾即迫公程不可稽又烏得無贈邪僕聞石城小邑當  
廣東西海南北之衝前朝以巖仄險隘特割置是邑所  
謂好則人怒則獸不可爬梳者君履之若夷五年如一  
日自非豈弟施化平易近民何以能之鬱林視石城為  
善地貳守視貳令為優遷志稱其好學者多其民力田  
務本屬縣三戶五萬糧不足二萬君端本於上縣承風  
於下其易治豈不十倍於石城哉然則顧侯所以竚乎



令聞者可計日而待矣抑化民成俗不在興學乎深山  
長谷庸詎知無趙德其人焉君體貌而禮羅之選弟子  
員而優異之暇即與為揖讓而拜習之民俗有不丕變  
矣乎所以奉公上而歡集慰民望而來蘇興頌歌而洋  
溢者舉不外是矣是為序

送楊璟齋序

大傳曰龍蛇之蟄以存身也揚子曰士不得則龍蛇夫  
一屈一信理之常然而亦不能於久屈如揚子所云者



則唯清修之士以退為恬者恒處之裕如也故宋叅政  
楊公鑄諸孫振瑛少從前進士祝公堯受業長由學校  
發身為王府叅謀代既更入閩嘗一為帥幕賓非所志  
也所居得信州城北韓侍郎竹坡餘基其地有玉溪龜  
山寶駝峯天津橋陸子泉皆名勝游行佳處君景行先  
哲超遙世表其清修何如非揚子所謂龍蛇者耶余與  
君解后於嶺南君所至虛左前席者不少酒酣氣張浩  
歌激楚有燕趙慷慨之遺風雖不獲於時亦不辱其志



今茲再聚首於青原將返其故居求一言以壯行夫揚  
子之云余與君同一嘅也君歸益求參政之初服而修  
之求侍郎之高致而襲之酌陸子之泉香而沃之天下  
之樂有過此邪若夫鍾鼎之腴軒裳之華樵叟漁童或  
笑之矣君字顯卿別字曰璟齋

陳中常歸會稽序

若耶仙子謂陽明洞賓曰久不聞樵風清唱不審中常  
丈人天遊何許賓曰聞其度彭蠡訪鄱君鼓柁青原白



驚之間五年矣仙子曰賓幸為我致書速其返無久滯也書至丈人即戒行李有海桑子者贈以言曰書稱耆壽俊詩詠老成典刑夫耆壽老成世有能致之者矣而俊為難俊而有典刑可師表尤難丈人弘度卓識超然物表論事常慷慨有賈生太息之意談笑傾座人有叔教抵掌之風大夫資以問政諸生有所矜式夫是謂之俊謂之典刑孰曰不然柰何翩翩乘天風而棄予如遺哉為我謝仙子曰道濟天下可也若耶之風朝南暮北



獨私於樵者可乎謝洞賓曰深山大澤實多豺狼陽明  
射的無遺鏃可也豈容一矢之或亡乎丈人幸厚自愛  
尚當相期汗漫遊於八極之表

秋雲先生集序

秋雲先生吳會之英也學貫經史而尤邃於春秋文肆  
天葩而尤麗於詩苑余不及見其著述而獲其詩詞讀  
之大概律詩有廷筠義山之風流宮詞得仲初文昌之  
格調變陳言為雅辭發新意於衆見第之作者允為名



宗會稽陳中常其高弟子也嘅先生舊藁不存僅僅收拾詩詞若干篇手自編次以示予曰所謂千百之十一爾幸序其端余始讀中常詩歌樂府敬其卓越非凡而不知其水木之有源本在是也嗚呼安得梓刻而傳以與好吟者共之哉

鄉飲酒詩序

洪武八年十月二十有五我縣大夫郝公好謙率厥僚屬暨縣之士夫民之高年行鄉飲酒禮于鄉校明德



之堂遵國憲也前期集賓佐師生成習其儀是日大夫  
肅賓于庠門外揖讓升堂以序就位乃命諸生祇奉大  
明律而朗讀之又參伍講之環堂階而聽者如織決知  
禁防之不可犯法意之無非仁矣既而以法行酒爵有  
經而飲不亂諸生升歌自宵雅肄三達於臺萊菁莪又  
賦泮水八章以終洋洋乎颯颯乎沐浴熙明之膏澤鼓  
舞循良之惠化無不醉心焉者惟我大夫下車兩朞堅  
守如鐵石至信如汐潮平施謹乎權衡燭隱踰乎水鏡



用能令出而從化久而孚得人之和致年之豐凡茲嘉  
與士民同其休成其文者孰非豈弟父母之心所形哉  
翌日王君子與偕善賦者咸為發德之什而屬其序於  
予嗟夫讀法周禮也所以納民於無過之地也有畫一  
之令與斷有賢大夫之善用法西昌之邑不其幸歟正  
賓陳謨序

永豐教官序

天下有才教官不患無名進士然得進士易得教官難



今之教官多出於進士而進士之負才名者什一而竄之亦罕矣此才教官難也吾邑郭子昭為永豐教諭垂二年彭君子文亟亟為予稱其學之政能不諉責於訓道與之同堂合席口講指授朝益暮習科分藝別壹遵時制而每加勵焉若夫抗顏乎躍冶之金而取長於攻玉之石日嚴乎佔畢之訊而時鏗乎待問之鐘又無不曲盡焉如是而為鄉校庶有成哉余惟子文言然固子昭所優為也且夫教人自端本始子昭以衣冠宦族守



正葩世學其質溫溫其言恂恂其動撝謙其文雅馴洪武五年余校文江西及開榜而子昭以詩經亞魁炳炳蔚蔚可為名進士矣既而上春官得職教永豐能舉其職如此可為才教官矣抑永豐歐鄉也多世科鉅公老成聞家又得子昭樂育其菁莪名進士繼此有不彬彬矣乎子文又稱子昭采芹外勺水不辱於朋徒毅然自重未嘗一失言失色於同人嗚呼又奚特為才教官而已邪



貞固齋文集序

蕭尚仁氏養高三華山下清修苦節積學績文甘以病  
廢然薰其德而善良者衆矣殆古之不顯亦世者歟其  
所著詩文命曰貞固齋藁余把玩不釋手愛其體裁正  
而豐約適中論議卓而波瀾洋溢允為成家諸詩小絕  
多警策撲茂而不鄙刻意而平夷律圓妥不陳五七言  
古體寂寥者更腴流動者絕蔓蓋所謂不以輕心出之  
者其文如此其學行可知矣尚仁本居城西柳溪之上



有園亭池沼之勝實衣冠科第之族其先君子方平先生於予為同志同學易同考業余齒差長一而穎異聰敏余固兄事之當前朝盛時方平壯遊嶺海間不返余獨學寡陋至今每憶相與童子釣遊之嬉文字講貫之樂何可得也故見尚仁如見方平不惟慶其有子尤慶其有子賢秀而文君子之流風餘韻光遠有徵固如此余日就耄尚仁亦華顛讀貞固集良深起予之益敬書此以為序



贈蕭李常序

縣學生蕭季常將昇大學來請言夫脫畧艸茅而縱觀  
山河之勝被服韋素而周旋冠冕之間馳逐雞鶩之場  
以超遙鳳麟之圃人固豔子之榮必子且貴矣抑傳有  
之觀於海者難為水遊於聖人之門者難為言思其所  
難為則將捨其故智以培其德基發其令聞如是而已  
吾老矣自顧無以補吾子萬一然信其必善學也必有  
立也故序以壯之



贈樂正劉本和序

蘭臯劉本和先生為郡庠樂正有年洪武壬戌上以勅符命郡縣以禮羅羅致巖穴賢士與共論治道本和在選中郡守與使者言樂正要職也非此其人則雅樂誰與興者使者勉為留之未幾朝命下釋奠先聖先師必用雅樂於是郡守之留為有以也樂正雖不得與三公論道於明廷乃幸得明夔夷制作於庠序庶幾邦人士聲聞絕俗之正聲非盛美歟於時以郡守之命來取琴



瑟之材於屬縣故旅于泰和因得相與道舊故序契濶  
焉嗚呼樂正世業也自其祖繼善先生與天慵熊先生  
為莫逆之交天慵精於音律盡以其法授繼善而繼善  
亦盡得其傳併以其不傳之妙而筆之於書其家固世  
守之嗚呼豈特廬陵一郡有所師哉大都大邑有不來  
取法者乎大司樂成均之教黃鐘大呂之奏獸舞鳳儀  
之祥豈有外於此乎樂正尤將訪材於它邑於其別也  
序此以嘉之樂正工詞章善戲墨山水至蘭菊竹石無



不精到則皆其餘事也嗚呼賢矣哉

贈寫真李約禮序

晉人稱傳神寫影正在阿堵中蓋眸子人之神氣也然  
繇頰上三毛槩之則一髮之失而神非矣人固以全體  
論骨法神情氣韻坐立當無不肖似乃名國藝郭令公  
女指前畫得趙郎形貌後畫兼得其性情語笑蘇文忠  
公令人於燭下取壁上影不施眉眼而見者識與不識  
皆知為東坡此全體之論也阿堵固全體之大防三毛



亦全體之一節也可不務與廬陵李約禮斯藝名三世  
聞四方余老復解后踈髯脩脩天風起之濯濯如萬絲  
柳而芝宇霞頰光眩暎發可愛談論古今事變及其先  
世文物酒酣氣張偉然豪傑意態此其全體也凡得君  
一筆無不如生而亦不輕一筆以予契久屢別為余筆  
之且謂予江湖間屢筆屢不似予故以前說為謝蓋全  
體未易言也約禮大父滄波與鄉衮文信公同里常畫  
信公於南禪觀者疑隨武子復生其父波餘亦如之班



固稱士食舊德之名氏工用高曾之規矩亂來食德者  
希若規矩高曾如約禮不替益精幾何人我嘗見前輩  
題安城劉氏乾坤清氣圖多宋季魁人碩士使來者願  
執鞭不可得於世教有補今亡矣約禮其無忽諸庸詎  
知今無其人耶

劉子彥應徵序

我朝天兵奮起淮甸擴清疆宇大河以北五嶺以南罔  
不臣妾洪武元年秋一鼓而燕市為墟再舉而關壘震



疊天統斯得皇心載愉爰及稽古禮文之事申明廷臣  
蒐獵巖穴網羅舊聞務酌古法因時宜不局局循故常  
已興而荐講迭考而旁求蓋質文相變損益取中帝王  
之道應爾也二年春廬陵劉君子彥由章貢應徵將入  
東觀陞容臺階秩宗奉常與天下之英討論著作成一  
代鉅典搢紳先生悉榮幸之願望之僕請贈以言昔令  
狐楚嘗云叔孫通起帝典於桴鼓之中自此以還鴻生  
碩儒若賈誼董仲舒公孫弘希不以此進夫禮所以治



神人和上下必若議馬舍儒者奚宜哉漢採秦儀雜就至唐號為繁縟宋頗採唐儀歲祝天下五方神州宗廟大明夜明太社太稷太一九宮騰腊謂之大祀文宣武成風師雨師先農先蚕謂之中祀靈星中雷馬祖司寒司中司命等謂之小祀或者猶論其以儀為禮以器為樂將禮序樂和猶未能同天地之大禮官博士之職猶多疵闕耶幸而委巷之龐雜諸家之聚訟洛建大儒悉析其淆而歸諸正矣今之議者視唐宋不殆優且裕乎



其弗獲施於當時者鴻生碩儒取而建白於今誠所當  
議也夫功成作樂治定制禮太平之盛致也值亨嘉之  
會被道德之華無疆之休禎也固以為君祝併以餞云

贈王孝廉序

孝廉字子啓通介人也值時危浮湛蹇傲以自晦前年  
會徵賢良方儼然衰經中州迫起之不得已之郡控辭  
太守太守曰吾奉命子行矣及藩府伏謁參政陳情焉  
叅政嘉之曰子姑終制需後辟孝廉既獲請益鞫跡以



邀洪武元年冬太子賓友李公行素奉旨搜訪巖穴士  
先時孝廉讀書南康山人莫之知及賓友至太守王  
公薦其名亟欲與見而州物色無以應也孝廉聞之懼  
州且獲戾即為書抵夾谷侯慷慨伸志已乃出謁侯侯  
大喜迎咲曰子真傲人間萬戶侯者邪孝廉謝曰正自  
不能不爾於是筮戒行州之賢士友咸為詩歌賓餞之  
介僕叙之僕既序事且頌禱之曰國之將興必產材於  
未興之先凡宋楠根楔穀粟絲枲類倚疊堆阜而沉鬱



之困躓之使諳練習熟強忍振厲以需於時用一旦遭  
時勃興皆能獻奇效智取勲名垂竹帛若古之輟耕太  
息抱膝長吟舉牛口出跨下緯蕭傭舂洗削賣漿者千  
載之下想望其人品風概何如也孝廉讀書時感歎於  
斯久矣有志當世亦素矣難莫難於際方興之運幸莫  
幸於當強仕之年不以古人自期可乎抑宋盛時有自  
天章龍圖兩閣學士開國太原郡公諱贄者孝廉所自  
出也詩曰無念爾祖傳曰公侯之子孫必復其始念之



深斯復之大矣若彼石處士騎將軍馬自以為不啻榮寵者夫豈所望於孝廉也哉

贈永寧縣丞序

永寧貳令蔣侯起宗承府公檄督轉輸南京之虧賦者吉支縣九侯督其六泰和以石計虧萬二千有奇侯來不十日輸者已盈萬嗚呼何神速也府公知其清強幹敏任之也篤蔣侯行以溫惠正毅感之也孚如斯而已泰和貳令夾谷侯催科能政為他縣竄尤敬蔣侯賢語



僕云宜得仁人贈言荅蔣侯寵光蓋侯世家淮安之安東讀經史練時務識運數推移歲丙午由樞密管勾隨總戎赴京款附授湖廣行中書省掾在職一年具有政績叅政傅公甚加敬愛隨侍入京遂擢貳永寧永寧處萬山間接壤衡湘號稱巖劇侯豈弟以裕之廉介以端之化用興行頌美斯盛溢以故府公隆是委焉余惟天之生材當興王之運儲之也久則發之必大蘊之者富則施之必充若蔣侯者詎止督虧賦一事見其所長哉



使艤將東僕始諧言面眩乎其神若祥雲之履紫芝溫  
乎其氣若春陽之韻楊柳藹乎其辭若穀粟絲麻之周  
於實用也且其律已至潔馭下至嚴公家餽廩一不受  
第飲澄江水而去嗟乎又止貳一縣稱窳而已耶

吉水縣尹費侯赴京序

有司庶府近於君者遠於民其窳遠者宰臣是也遠於  
君者近於民其窳近者縣令是也書曰民可近夫民孰  
肯遠之哉乃亦不得不然者體統建而勢分絕也在易



之比曰先王以建萬國親諸侯萬國至衆非一人所能  
徧親先王特親諸侯而俾諸侯各親其民此近民之道  
也故宰臣者承君之號令德澤而致之方國而縣令則  
宣通其號令流暢其德澤而致之民者也大明啓運尤  
重縣令之選優其禮隆其責且著令三年一朝不重內  
輕外使咸得自達焉美政令譽者既益知加勸而中材  
常調者亦凜有所勉而務求為善非良法歟於是文江  
令費侯振遠將行其嘉賓胡君子祺言於僕曰侯為縣



三年稱神明如黃穎川務保障如尹晉陽守清白如楊伯起忘憂喜如孫叔敖興學校如李贊皇別鰥鮒如宓單父至若租稅無逋庸調均節工役日集獄訟不滋在侯為能事蓋不勝書者凡衣冠清流樂侯之趨朝而書寵願侯之增秩而造歸作為歌詩邀僕序其端以為頌祝僕雅知侯善製錦而不伐又嘉子祺善論德而不浮故樂序之僕嘗聞昔賢頌循吏有曰一之歲肅而教之二之歲惠而安之三之歲富而樂之今文江之民可謂



富且樂矣樂民之樂者民亦樂其樂民惟恐侯陞朝為  
公卿而不得保有其樂於將來也侯必念茲必賦之曰  
歸哉歸哉尚與爾同樂乎哉

永言序

李伯葵氏以其永言示余讀之往復數四嘆其志於古  
道甚篤蓋近古莫如選次古莫如唐后來者莫或尚之  
伯葵學選優柔沉著每有新意至其曲折態度情景俱  
會處得於蘇州為多亦其資稟冲嗜好澹脩脩然出塵



整整然束禮故其吟咏情性有之似之甚不易得也七  
言樂府高古如遼陽行白紵詞長門怨次之唐律圓美  
清鍊又次之自他人不能兼者伯葵悉兼之矣尤為可  
尚嘗忤新學談詩類不滿人意尊選者易唐李杜以為  
剽出右唐者弱選魏晉幾成絕響剽掠潛竊以為工其  
為選也固不難點綴花草以為媚其為唐也亦安在必  
若阮嗣宗王仲宣所製不犯十九首句字而音節氣韻  
酷似之始可言選矣必若李杜為律為長句天縱渾成



闕涉浩瀚始可名唐矣斯乃白頭書生苦心莫能希萬  
一也烏得易而弱之因書伯葵集漫及此嗚呼尚有如  
伯葵之兼致其工者乎

五同軒後序

讀德基吳少府五同軒記有云古之同者同乎心今之  
同者同乎迹又云必將同乎古之人古之人可也昔我  
言乎吾觀公亮王君與張子陽同里閑同患難同歸鄉  
同揚歷省若憲掾同者五而已矣由五而充之雖萬可



也一理同萬事宜無不可者萬而有一之不同一虧而衆乖矣故君子不尚同不黨同者同乎理而已然理同事同其同也常事不同而理同其同也大易曰君子以同而異傳曰不能大同者亂常悖理之人也不能獨異者隨俗習非之人也昔人有同不同異不異者意頗近似而先正有上殿如爭下殿不失和氣者乃所以為同之大者也少府欲二君同乎古之人欲二君同心不同迹正以皆知同之為同而不知異之為同爾二君臨大



事斷大獄決大議勿雷勿阿必辨必允俾民稱願曰蕭  
規曹隨罔美于漢房謀杜斷何美於唐不其韙乎不其  
韙乎

集太白句序

右集太白句十章川上鄒君為子與王先生頌也何言  
乎頌先生受徵至不屈上寵嘉之也其寵嘉之何先生  
德充而慮審智圓而行方上始用臺臣言特徵為說書  
既入覲因壯其老官之要劇懇辭不拜再四益堅乃完



其隱節也國制田賦之家大者歲朝受諭鄒君既親觀先生寵嘉之美又並舟而上故有是作歸以示僕反復讀之歎其精工昔朱文公有言李太白聖於詩者也凡人情物態他人累句不了了者第一語而盡集中包括廣闊繁大鄒君熟復之善用之非牽綴強聳者比宮商相宣金石諧和雖謂太白復生為子與賦可也僕故書之且題其後云

贈進士馮韶泰序



洪武庚戌僕校文廣東歸驛抵韶始與陽山學者馮君  
韶泰諧晤于舜峯之下其人磊砢而英俊其論議卓有  
器識僕固卜其遠大且惜其不屑於場屋因以進士業  
勉之而君亦浩然欲相與求麗澤之益也壬子孟陬君  
惠訪予于白下僧舍相勞苦外問近況則以周易貢于  
鄉上春官矣復求贈言嗟乎將何以為贈哉雖然韶古  
百粵也三代以前夔取磬材於韶涵濡聖化尚矣秦漢  
而下以武壯隋莫如麥鐵杖以文佐唐莫如張曲江韶



泰得於耳目之見聞習於義方之涵育非如崛起草萊而偉致通顯以榮耀桑梓者也明良在上凡穀粟絲枲梁棟榱桷不遺遐遠不棄憔悴而况皦然以明經進者乎况讀四聖人之經知進退存亡之道思欲不失其正者乎外之為良守令內之為名公卿毋渝素守毋負實學其為科目之重也審矣其為邦家之光也遠矣請以為贈

贈醫士謝禮卿序



禮卿本興國衣錦鄉故家今居章貢以醫聞僕嘗觀縣志鄉名衣錦以謝肇故肇在唐廣明中和間累以機鈐經畧功位至金紫光祿大夫檢校戶部尚書爵會稽子在南唐保大有至尚書左僕射右千牛衛將軍者在宋建隆有至散騎常侍兼御史大夫者皆積階銀青光祿大夫皆肇之後今其後雖多皆逐氓伍獨鄉名猶榮耳然禮卿獨以方技取重於時不失為士類數百年間衣錦之餘光不在此乎今夏邑判簿張侯由郡窰所歸而



嬰疾疾日增衆醫持兩端涼燥雜試藥不能伐病令尹  
馮侯貳令沈侯乃走急足致禮卿焉至則首踈其痰痞  
徐理其實熱凡兩下之十七八行而後所苦悉迎刃而  
解向微禮卿投駛劑而姑優游以養之是殆閉賊于奧  
而衛其堂也久則敗矣二侯命僕贈言以餞禮卿僕賞  
其醫術而高其世家故樂序之人有恒言不得為良相  
則為良醫禮卿有焉

謝維高升太學詩序



平川一小縣而在贛為上腴絲麻穀粟之利行乎四方  
竹箭皮革之美被於上國其民亦多秀而文碩而茂蓋  
維昔然矣在唐時則有若鍾紹京名在旗常功著社稷  
在宋時則有若李君行學行純懿為世羽儀其尤表赫  
顯顯者也夫平川有如是之先正前烈故士生其間資  
稟超軼者感慕興起樂於為善而常有以致身於不朽  
其次亦足自表見於時又其次亦不失為善士嗚呼其  
可敬也夫余嘗應大夫之聘一至其邑其來學之士有



謝嶽維高者質醇而稟厚內剛而外謙讀書經通其間  
與習經義要其指歸達於體用之學而不滯適於時用  
之宜而不浮可以為善士矣其於學校可謂不辱矣洪  
武十二年八月有旨州縣學生員在學年久學通經術  
善為文辭容貌端莊行無玷缺者升入大學教而育之  
而平川大夫以嶽為首選嗚呼在於鄉學卓有令譽則  
夫蜚聲於僻水騰躍於天衢固其所耳雖然嶽其勗哉  
抑抑乎其進之恭也恤恤乎其守之嚴也沉沉乎其思



之長也遜其志如有所不能敏於事如有所不及使道  
之未充者日益充行之未果者日益果見聞日益廣而  
出於尋常者萬萬交游日益多而得於名勝者肩相接  
也上以副聖君賢相樂育之盛心下以慰平川大夫士  
之願望而遠以紹鍾令公李先生之高風芳躅也顧不  
偉哉既行拜余於青原故書此以贈之

送陳守道就養序

洪武十二年春陳子都以詩經貢禮部授西安府藍屋



縣丞是年六月到官即走急足三千里迎致其父母以就榮養十三年二月其嚴君守道先生始克就道來別於余余惟人莫難於能績學學莫難於能得祿祿莫難於能逮養學而不足以受祿者獨善之民也祿而不及於奉親者永感之民也今子都學足以適時之用春官擢其才天官隆其任貳令於大縣可以為達矣守道義方之訓行於宿昔而迎養之禮不憚於數千里之遠平達於康莊端居於公館起處節適旨甘豐時可以為榮



矣雖然長安古帝王之都也有洪河涇渭之川有終南  
峻函之險按周秦之故攬漢唐之遺在此行矣過曲江  
而想漢陂之勝槩過麟遊而弔九成之荒基而金城之  
千里山河之百二俯仰猶昔也有不慨然興歎惻然長  
懷者乎君故能吟明年侯君歸錦囊之富當傾倒羅列  
以貺我

竹間集序

古之君子政事文學理同而事異蓋仕以行其學之用



學以充其仕之資也今之君子學不必優而可以從政  
仕雖有餘力而不必學者亦多矣予讀王君竹間集固  
自有省哉君筮仕最早繇江右敷歷嶺海所至政與學  
俱有令聞者以其退而不自足進而不枉道也夫其鍾  
粹稟溫故其詩雅馴而藻潔其中寬而有制故其詩不  
矜而嚴紆徐而達其臨政奉法恒務大體不激不阿故  
其詩體裁正而槩雋精其議論古今是是非非笑言雅  
雅無詘以隨故其詩善諷而婉堂有垂白之母二毛之



兄累累辭榮歸養不克遂夢寐以之讀其詩知其於孝  
友最隆也暇日弦壺棋槩筆牀茶竈隨寓皆然尤深契  
叅同旨收視反聽與天者游其貌澤如也故其詩脩脩  
其氣飄飄讀之者又有滄洲紫霞之想嗚呼君於文學  
至矣既老而彌劬不倦而逾密獨其見於用者猶未足  
盡所學之長將時邪抑有待邪予當慨乎天地之英華  
散於萬物其在人則為文章事業不得於事業則得於  
文章李杜光焰萬丈炳烈千古將非不得於事業然耶



彼在天者吾無如之何顧吾所以自立與傳後何如斯  
賢達之高致也集中佳製率慕漢魏盛唐之風而無齊  
梁綺紈之習其為可傳無疑余又因君筮諸易剥必有  
復復必有泰以其時可矣如君之才其有不鳴國家之  
盛乎

吳子齋奉母歸宜春序

天下之樂莫樂於奉其親奉親之樂莫樂於還其鄉夫  
甘旨嘗豐而松楸不能時展綵烏日侍而桑梓不能敬



恭親之心有不歉然長懷者乎苟有能養親之志者得不恐恐然如弗及乎夫弗獲已者時也弗可失者機也昔世變方殷人皆流離顛沛皆無如時何若江革負母逃難備經險阻採拾為養以倖免為萬全者豈獲已哉故遊子悲故鄉莫切於事變稍定之日稍定則機可乘若之何失之王仲宣稱張儀楚秦莊舄越吟以為人情同於懷土不以窮達有異而況鶴髮偏慈日夜念其親戚墳墓宜何如邪齊之吳君奉母歸宜春而章貢交游



與流寓賢士莫不嘉羨嘆其榮於畫錦賢於以官為家者俾余序之夫以齊之之賢孝於奉親先意承志他人稱為盛美者齊之皆常事而還鄉亦常事也常事而弗克如齊之者猶多即其善可一二計哉今還其鄉昔之耆而艾者存十一於千百必皆稱願曰賢哉斯母有子如是慈孝之表也昔之童而丕者若壯若彊必皆嘆息曰吾戚懿尊章安在斯人斯母融融然洩洩然天相之福也善果不可為乎為善果不康裕乎陶潛田園荒穢



可從而理也王凝門巷果木可方而列也玄晏之書滿  
室子雲問字之載狎至而太夫人軒軒板輿潘安仁閑  
居之賦如畫也不尚有增夫天理民彝之重哉

青陽行樂圖序

清江孫碧霄為西昌貳守黃侯允中寫青陽行樂圖僕  
元年冬歸自韶石始獲與侯面且觀圖焉乃序之曰古  
之君子極軒冕珪裳之貴而不易其山林畎畝之守者  
其樂無不存也故觀豐水之有芑可以知數世之仁動



高山景行之思可以忘其身之老夫山與水何所獨無  
何人不玩然反諸已而深契省者寡矣彼其考澗槃以  
自足樂泌洋而忘飢自謂三公不與易者抑豈知窮達  
一致定應不拔即廟廊與巖谷何遠故君子之樂無適  
而不存焉無適而不存者得喪是非舉不足以為累也  
昔有以問樂之故曷以曰仁仁故樂極天下至美不足  
以過之况山與水乎山與水寓也而樂亦無不存也黃  
侯系出雙井生岳州臨湘縣青陽里長即宦遊四方因



以青陽為別字不忘本也畫史寫而成圖若常對然侯  
起居節適時而展之先人之桑梓童子所釣遊歷歷然  
也昔太公封齊五世皆返葬於周狄公望太行白雲念  
親舍在其下君子移忠於君而孝思常不替若此然則觀  
斯圖者不獨見侯之樂抑足以知其孝矣況夫青陽者  
春之司也在天為元在人為仁元首善也仁全德也里  
以為名而侯以別字豈徒然邪凡立身種學歸宿於仁  
蒞官行政根本於仁一動靜和之以天倪外窮達安之



乎素履將風日妍美吾冲襟也原隰光華吾生意也青陽之景常淑青陽之里常近何陰威慘戚之患何道路阻脩之懷亦何適何寓而不樂哉吾故曰仁故樂而非窮達一致定應不拔者其亦孰能與於斯

贈醫士劉彥昭序

醫有經有守有變理以為經法以為守而變者權衡乎其間理無變法有變變而常適其中其惟洞於理而精於法者乎天官醫師理之原也內外經理之淵也然而



簡與玄微未易靈悟故南陽張機病其難明且痛宗族以傷寒斃者數百口遂著為經論以發其隱備為治法而處其方詳為問答以盡其變此東漢以前所未有也至成無已劉河間諸賢又懼南陽之論猶非後所窺測又從而毛舉髮櫛別嫌闡幽門分類析殆無餘蘊此又晉唐以來所無也凡欲所學者洞其理精其法而妙於變耳嗚呼大賢欲公其道於天下也如此而世或有得一方自以為秘施一劑惟恐人知同業而羞講共事而



忌疾者何哉學聚問辨之益不充而謀利計功之私日勝故也友生楊仲升曰太醫彥昭劉君獨不然彥昭世業也恒不自足合孔孟岐黃之書而求其統之宗會之元也理有未白法有所窒親賢近仁常溫溫乎金之奏而玉之應也人有疾不擇貴賤而赴之不以為功而功之歸者衆與之藥而不責償者復不少唯務已人之疾而已余今年病熱甚得彥昭良已至今無以謝也彥昭家種杏成林而林中題詩連屋者得詩重於得金也先



生幸書前之所言得藉手謝焉余與仲升別久觀其文  
嘗有為陳侯謝彥昭者今其言又若是懇懇信矣哉為  
賢醫士矣夫去其謀利計功之私而廣求學聚問辨之  
益理以為經將無一之或遺法以為守將無施而或戾  
權衡以通變將出入疾徐無不迎刃而解周官所云歲  
考十金為上者其必於彥昭見之且窮而在下存心愛  
物宜莫如醫此南陽著書意也夫讀其書安有不廣其  
意者乎



孫碧霄歸新渝序

辛卯壬辰之亂清江賢士君子率徙家保上流不數年而上流亦不可保往往逐便利苟昕夕以僅免顛隳為至幸方是時王孫公子求如竄人有不任者矣求為他道有弗習者矣雖賢士君子不失其正者幾何人哉而渝上孫君碧霄寓西昌獨不失其所守之常十五年如一日在他入坎窞者君履之若夷及豺狼之性稍就帖息向之鼠竄者皆返我羊肆而君所至人愛之敬之殆



不忍離君亦安於久客如其鄉然嗚呼君賦質厚以冲  
處性謙以周待人和而正學有源本自天時地理方術  
卜筮等皆所研究而丹青圖寫妙得顧虎頭吳道子法  
則其世業尤為無敵故不求即人而就之者衆未嘗枉  
已而處之者裕常義取而無浚恒雖澹交而有深益茲  
其所以稱善於亂世曲全其所天也歟是豈不賢而能  
之歟余與君最厚且契然方役役四方不得日從君游  
樂不亦重可憫笑邪今年留章貢於太守常方壺所觀



晉隋唐宋名畫法書不一其尤著者義之智永真蹟余固識其筆意若閻立本醉道圖許道寧米元章山水黃荃崔白易元吉花木猿鳥等類能觀其神氣之逸耳至其造詣精絕天然入神處槩不能窺測一二念安得碧霄共觀之而指教其肯綮要妙豈非絕無僅有之一快哉適兒子家問至言君行且歸渝上得之惘然殆難為懷抑君知天時者也君之行時之泰其有兆乎余遠道不得執別獨贈以言夫當亂世居他鄉不失其常猶若



此則其歸亦焉往而不得所當勉者惟善保以需良晤而已

斗室詩序

易曰退藏於密傳曰居天下之廣居密者心也廣居仁也君子之道歛之不盈方寸不亦密乎散之彌滿六合不亦廣乎是故挫萬物於一毫卧千里於一咫尺堆以取勢位吾皆蝸之競侈以高族閭吾皆孩之天吾與徒賢聖吾與師振古豪傑吾與游衍也輩昌汪君敏德實



辦茲事扁所居曰斗室既自賦之又與朋徒偕之工者  
咸登諸軸予既為吟二章且介予序其軸端嗟乎善觀  
天下者天下小於斗善宰天下者天下不出吾斗古之  
人貧而漁釣賤而畊莘胥靡而版築其藏密斗室之中  
亦樂矣然其固居天下之廣居也自非達可行於天下  
則固終身甘之矣或曰斗室陋如之何余曰圖史吾金  
玉也風月吾藻績也文章吾錦繡也杖履吾車馬也江  
山吾俎豆也草木之榮華禽鳥之宮商與凡樵歌牧笛



則皆吾聲伎娛翫取諸左右無不足也何陋之有

贈袁叔異入國學序

吾鄉故家文物凡數姓而袁氏最著曰文煇者以天子  
與日月並明賦偕兄樵同登紹定榜其子灝復以天子  
純德天定位賦世其科而樵之兄弟若椿若櫟亦皆先  
後馳聲名列進士榜中載在郡庠碑刻班班可考斯亦  
盛矣哉灝之子公鼎當元之初隱德弗耀公鼎之子啓  
東際皇慶延祐盛時甘肥遁以老其子則復初也與予



同學然皆不得志於場屋復初子彥聖也際大明興運  
為太平幸民於是縣選其子叔異入鄉校為弟子員而  
彥聖亦幸其子之周旋乎衣冠俎豆從容乎揖讓進退  
上以紹奕世之箕裘下以啟方來之簪紱其必在是矣  
叔異粹乎其為資也煥乎其為表也鑿鑿乎其制行也  
軒軒乎其立志也碩碩乎其務學也蓋已秀出乎等夷  
矣洪武十五年皇上以胄監新闢學舍增廣取郡縣生  
員以實之西昌之學起者七人而叔異在焉是行也吾



知叔異近有以光其高祖父敷遺之休遠有以紹其六世七世祖武之科名不斬之德澤固有出於同時同門之右者不其偉歟因府學生員蕭李常為叔異求贈言故叙其世家以期之云

栗陽劉氏族譜序

澄江稍迤而南為栗陽劉氏以和世居之居有園池亭榭松林竹樹幽雅夷曠而以和益簡澹濟以吟咏之勝殆古之肥遯者矣自亂離來余避地韶陽與以和不相




合并者數年然閭里凋敝故家老長存者無幾暨歸獨以和無恙依然保有林原之趣蓋捐利好施貽謀敦善富若寓而不矜憂可通而不累故雍穆成風焉今年春余過其家握手相勞苦外間出與其伯氏以文所編族譜一帙介予叙之且深慨夫兵燹散逸之餘其所紀者記憶耳矣予惟與治同世者事易集與亂同世者事罔攸濟矧殷憂且不暇奚能庸心於是以和之志可悲也夫按劉氏其先金陵人宋紹興間有諱廷傑與兄廷俊



居于縣治之東廷俊復遷之燈窩嶺進士譚倫為易其名為登科嶺以期之廷俊後果登第官至辰州知錄廷傑五傳至文先則又徙今之栗陽凡若干世其間業儒以光于仕者督耕以食其力者樂恬淡以尚其志者存忠厚以世其家者躬孝弟以順其則者皆輝映簡冊表表可見夫自仁率親而知愛自義率祖而知敬自禮率分而知不越若斯譜之作其為世道計也深矣使後以和者因睦以合族而不至於途人相視則其道可久而



子孫長世也端不在茲乎嗚呼以和之志其可悲也夫  
其可尚也夫



海桑集卷五